

# La Fregoles

*Vèlch neva en curt*

## Gran Festa da d'Istà: 41? Va ben!

En vender ai 11 de otober l'é stat la tradizionèla festa de ringraziament ai volontères che, con cher e bona volontà, i se dèsc jù acioche la Gran Festa da d'Istà la se dejouje con bon resultat. Na sdragola de persones, nesciugn desmentié, à tout pèrt a la cena al Hotel La Perla de Cianacei, te n'ocajion che à binà ensema jent da duta la val, jent che con sie didament à fat a na vida che ence l'edizion 40 de la Festa sie jita delvers, enceben n temp che no à nia didà e che à fat sutèr, per la seconda outa te 40 egn, la longia defilèda che met ensema duta la Ladinia.

Endèna la festa l'é stat ence i descorsc de la autoritèdes con Andrea Ongari che l'à portà l salut de l'aministrazion de Cianacei e sie ringraziament a duc i volontères e col president del comitat de endrez de la Festa Gigio Dantone che à dit fora la neva che duc spetèa: «Descheche ède sentù duc chenc – l'à dit – l'era vegnù fora la ciacola che la Festa da d'Istà no fossa più stata. Cogne dir che de n vers l'é vera che aon abù vèlch problem, ma apontin enstadi se aon troà con l'Aministrazions e la Istituzions che les ne à dat desponibilità e sostegn. Nos del comitat ge dijon develpai a ic e ringraziacion voetres volontères, che siede l cher de la Festa, e sion vertesc a jir inant, donca posse dir che l'é dut a post, semper che ence voetres fossassède a una!». Coscita con n bel grignot generèl se à desidù che la Festa da d'Istà la no se ferma chiò, la no se ferma a 40, ma amò n'outa la binarà ensema la Ladinia: sion jà a 41!

DV



Da m.c. Andrea Ongari, Gigio Dantone e Giorgio Pedron.